

La separaziun dil cumin della Foppa 1661-63

Autor(en): **Maissen, Felice**

Objekttyp: **Article**

Zeitschrift: **Igl Ischi : organ della Romania (Societat de Students Romontschs)**

Band (Jahr): **44 (1958)**

PDF erstellt am: **27.09.2024**

Persistenter Link: <https://doi.org/10.5169/seals-882357>

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

La separaziun dil cumin della Foppa 1661 — 63

da Sur Felice Maissen, cpl. Zignau

La pli greva e prigulusa dispeta confessionala en la veglia republica dellas Treis Ligias dapi il temps dils embrugls grischuns ei senza dubi stau l'enconuschenta uiara de Sagogn (1701). La discordia era ida aschi lunsch che plirs melli umens ord omis dus camps confessionals han tschaffau las armas ed ein marschai encunter Sagogn, pinai per ina horribla uiara burgheisa, che havess pauc far, bugnau las bialas cultiras denter Glion e Sagogn cul saung dils fegls della tiara. Il preludi leutier ei stau la separaziun dil cumin della Foppa digl onn 1693 en in cumin catolic seniester ed in cumin reformau da vart dretga dil Rein. Il motiv de quella distaccada ei stau ch'ins haveva continuadamein giu dispetas pervia ded occupar ils uffecis de cumin e della Valtina. Ils catolics selamentavan ultra de quei schiglioc aunc adina sur de parzialitads da vart la dertgira e de suppressiuns della part catolica en minoritad. Mo era ded autras discordias era ei buca munconza e savens vegnev'ei, sco dil reminent era en auters cumins, tier caneras, sedadas e sepitgadas a caschun dellas elecziuns e tschentadas.¹ La part catolica della Foppa ha semplamein elegiu sezza sia atgna dertgira e tarmetteva ses mess ni deputai allas dietas. Alla proxima dieta de s. Gieri a Trun ei denton semussau difficultads, essend ch'ils mess reformai della Foppa impedevan ils catolics de prender part dallas radunonzas. La part catolica ei lu seviulta tier la dertgira della Lumnezia per schar decider sur de lur separaziun e quella ha lu approbau la separaziun entras sentenza contumaziala igl onn 1698/99. (Lugnezer Sentenz)²

¹ Sur la separaziun della Foppa dils 1693: dr. J. J. *Simonet*, «Der Sagenserhandel», en *Raetica Varia* 1922, pg. 3—4.

² *Simonet*, *Sagenserhandel*, pg. 5—6. Ariguard la sentenza de Lumnezia: *archiv episcopal, Cuera*, mappa 59, «Lugnezersentenz», ina copia dil protocol della sessiun della dertgira a Vella cul plogn dataus dils 18 de nov. 1698 e della sentenza dils 18 de fevver 1699.

Ei para che las differenzas de lezs dis eran nuot da niev ella Foppa, pertgei gia biebein trent'onns pli baul eis ei vegniu tier ina separaziun transitorica dil cumin della Foppa. Il settember 1661 ein las vischnauncas catolicas sedestaccadas dallas ulteriuras da vart dretga dil Rein ed han formau in agen cumin pil spazi de dus onns, in fatg historic ch'ei tochen ussa buca vegnius alla glisch dil di.

Il cumin della Foppa consisteva da lezzas uras ord las vischnauncas che formeschan ozildi il medem circuit, cun excepziun de Schluein che fuva in cumin per sesez e de Lags cun Sevgein che formavan puspei in agen cumin. Ei fuva pia las vischnauncas da vart dretga dil Rein, ch'eran tuttas reformadas, numnadamein: Glion, Castrisch, Valendau, Versomi, Riein, Pitasch, Luven, Flond e seniester: Schnaus e Strada, e lu las vischnauncas catolicas de Sagogn, Falera, Ruschein e Ladir. Sagogn era paritetic, mo era a Fallera deva ei, silmeins per temps, enzaconts reformai, aschia ch'ils de priedi havevan per lunsch ora la maioritad.³

Ils motivs della separaziun ein en ses pli exacts detagls buca enconuschents. Las fontaunas historicas ein memia munglusas e scartas persuerter. Denton selaian las raschuns de quella spartida reconstruir ualti bein ord las tractandas de pli tard ed oravontut ord il contract de reuniun de 1663⁴. Tenor quel regevan gia lu quasi las medemas relaziuns sco trent'onns pli tard a caschun della separaziun de 1693, numnadamein discordias pervia digl uffeci de mistral, bursèr e scarvon e dell'elecziun dils mess e dils officials en Valtelina (punct 2—6). Aschia selamentava la minoritad ded adina stuer vegnir alla cuorta. Era plunscheva ella da parzialitads da vart della dertgira (p. 9). Denteren deva ei puspei rizraz denter las duas partidas confessionalas pervia dell'observaziun dils firaus (p. 10). Mo era il fatg che certas vischnauncas vendevan lur uffecis ordeifer il territori della dertgira aulta, caschunava bia malaveglia (p. 11). Ei para era ch'ins haveva giu de far arriguard il liug de residenza de cumin, essend che Sagogn rivalisava cun Glion (p. 8). Duront ni avon il temps della separaziun ha ei plinavon aunc dau, sco ei para,

³ Pertenent la partiziun dils cumins cp. *Pieth*, Bündnergeschichte, pg. 114.

⁴ *Archiv cantonal Cuera*, protocols dellas dietas, tom 31, pg. 39—41. Il contract de reuniun comp. sutvart, pg. 6—7.

denter ins ed auters enqual hurscha e «malgartiada procedura» en plaids ed ovras (p. 1). Il nunzi apostolic Frederico Borromeo numna en in rapport summaric sco raschun della separaziun medemamein il surdiever della maioritad reformada enten plazzar ils uffecis.⁵ Igl ambassadur della republica de Vaniescha che residiava a Turitg e ch'era adina bein informaus sur de tut quei che cureva e passava el Grischun, rapporta aunc pli detagliau: ils catolics de quei cumin garegian la medema art e part enten occupar ils uffecis della Valtellina, essend ch'els ein pliras gadas vegni sclaus diltuttatg en quellas elecziuns della maioritad reformada.⁶

Ils protocols della dertgira della Foppa, ch'entscheivan cugl onn 1658 e che vegnan deplorablamein interruts gia la fin de settember 1661, pia gest leu nua ch'ei entschavess a vegnir propi interessant en lezs dis, nua ch'il cumin va dapart, per continuar pér cun l'entschatta dil 18. tschentaner dat a nus era buca pli detagliau sclariment dallas raschuns sezzas della separaziun.

All'entschatta settember 1661 era il fiug della dispeta gia ruts ora. Ils siat de quei meins havevan ils delegai ni representants dellas singulas vischnaucas della Foppa de vegnir ensemen a Glion, per ordinaziun della dertgira, per sedeliberar sur della presenta differenza dil cumin e per prevegnir ad eminent mals pli gronds ed era per tschentar si in project ni proposta de pacificaziun. Denter ils compari sesanflava il fetg respectau e perdert dr. Guglielm Schmid de Grüneck de Glion,⁷ il mistral Brincazi Caprez,⁸ che gudeva da bia stema, sco era il giuncher

⁵ *Archiv federal Bern*, copias de Ruma, Nunziatura Svizzera, vol. 55, corrisp. dils 27 d'oct. 1661: «... mentre li cattolici, in non multo minor numero delli heretici, vendendosi da questi sopraffatti, sempre nel governo pupplico et elletioni de magistrati, si sono risoluti separarsi e far corpo distinto, ellegendo proprii officiali e deputati per mandar alle diete che e punto de qualche conseguenza a tempo e luogo riguardo la pluralità di voti...»

⁶ *Archiv federal Bern*, copias de *Vaniescha*, Dispacci del residente Veneto a Zurigo, tom 71, pg. 54. Rapport digl 1 d'oct 1661.

⁷ Dr. *Guglielm Schmid de Grüneck*, della nobla schlatta de Glion, fegl de dr. Jakob Schmid de Gr., colonel e politicher, ei staus professor all'universitad de Genevra 1629, mistral e landrechter, savens delegau tier pussonzas jastras. El ha obteniu dagl imperatur Ferd. II il tetel de «Titular Pfalzgraf». Morts 1662 a Chiavenna. (*Lexikon hist. biogr. d. Svizzera*, VI, 212.)

⁸ *Caprez*. Dasper l'enconuschenta lingia de magistrats de Trun, existeva aunc ina lingia reformada a Glion. Omisduas ein oz mortas ora. Ei exista aunc ina lingia reformada a Trin ed ina catolica a Panaduz. Brincazi Caprez apparteneva alla lingia de Glion (*Lex. hist.-biogr.* II, 490).

Cristoffel de Montalta,⁹ che possedeva buca pauc influenza. Ultra de quels eran aunc ils suandonts presents: il «bannerherr», il scarvon Gion Leci Kiebler, Martin Nuttli, Risch Alig e Gieri Coray e Gion Caspar. La radunonza ha denton pudiu drizzar ora nuot, essend che dals 17 citai ein siat insumma nuota com- pari. Schmid e Caspar protestan ferm encunter tala negligien- tscha, ferton che Montalta propona de transferir la radunonza sin pli tard. Dr. Schmid scriva la caussa allas vischnauncas.¹⁰

Ils 12 de settember referescha dr. Schmid sur dil resultat de siu messadi allas vischnauncas. Il protocol de dertgira di buca ora enzatgei clar davart las rispostas de quellas. Valendau less per ex. refierer aunc inaga quellas tractandas. Castrisch vul insumma desister da tuttas formalitads e far las elecziuns da cumin sin s. Mihèl sco da vegl enneu. Risch Casura da Fallera rapporta, che cura ch'el seigi passaus giud vischnaunca, hagian ins votau da garegiar la separaziun dil cumin. Da Ru- schein vegn negina risposta. Ord ils votums de Luven e Pitasch san ins trer singularas conclusiuns, sch'els garegian ch'in e scadin dueigi saver ir a cumin segiramein e ch'ins dueigi buca vegnir cun pistolas e de quellas caussas alla tschentada.¹¹

Las relaziuns vegnan denton adina pli e pli precaras. Vicen- deivlas smanatschas vi e neu! Era pervia d'ina elecziun en la quala in cert Martin Nuttli ha stuiu suttacumber a siu rival deva bia da sescagnar; ils de Valendau pretendevan ch'el hagi giu dapli vuschs che siu cuntercandidat. Quels da tschella vart dell'aua smanatschavan cun la separaziun. La dertgira sesprua- va bein ded intermediar, da metter perina, sinaquei che las elecziuns sappien vegnir fatgas da s. Mihèl.¹² Mo ella dumignava buca pli la situaziun. Ei era memia tard. Ils catolics eran decidi autruisa.

9. *Montalta*, vegl patriziat retic. In Simon M. compara gia 1209. Pli tard schlatta de ministerials e giunchers, che compara gia el 15. tsch. a Morissen. Dasperas dat ei ina lingia de Lags, de Sagogn e de Glion (Lex. hist.-biogr. V, 140/141.).

10 *Archiv cirquital Glion*, cudisch de protocols ch'entscheiva cun 1658, buca pa- ginaus, sut il datum dils 7 de sett. 1661. Denter ils representants ch'ein buca compari figureschan ils nums: Dr. Wolff, Ir. Rageth Nuttli, scarvon Hans Barthle Montalt, Jakob Casutt, Disch Casura, Landvogt Christ., il saltèr.

11 *Archiv cirquital Glion*, cud. de Protocols 1658, sut ils 12 de sett. 1661.

12 *Archiv cirquital Glion*, cud. de Protocols 1658, sut ils 16 de sett. 1661.

Il di de s. Mihèl, ils 19 de settember dal calender vegl, ni ils 29 dil calender niev, suenter il qual ils catolics mavan, ferton ch'ils de priedi setenevan aunc adina vid il veder, essend ch'il niev plascheva buc ad els per esser instituius d'in papa da Roma,¹³ ein ils catolics da l'otra vart dil Rein serimnai a Sagogn ed han fatg leu cumin denter els. Ei han elegiu lur agen mistral ed ils derschaders — ei era cuort avon che l'ordinaria tschentada dueva haver liug — e quei senza s'empatschar la minima caussa dallas declaronzas e protestas neu da Glion.¹⁴

Spert seradunescha la dertgira a Glion per mirar tgei far en quella fatale situaziun ed ella vegn dil pareri ch'ei seigi meglier ded encurir agid tier il corpus reformau dallas Treis Ligias. Per tal intent elegia ella ina deputaziun consistenta ord las treis persunas da senza dubi gronda peisa: dr. Guglielm Schmid de Grüneck, Brincazi Caprez e Stoffel Montalta. Quels duegien serender a Cuera avon il Cussegl Evangelic dallas Treis Ligias per prender leu plaid e cussegl co sestalegiar en la «presenta discrepanza» e per puspei vegnir tier ina reuniun. La delegaziun survegn aunc enta maun dalla dertgira ina detagliada «instrucziun» en scret sur da lur missiun, tenor usit da gliez temps.¹⁵

La part reformada, buca mo dal cumin, mobein era dalla Ligia Grischa, sco era dallas Treis Ligias insumma, veseva ina tala separaziun mo fetg nuidis e combatteva tala sin la pli intensiva moda pusseivla, essend che entras questa separaziun fuva in niev cumin scaffius e cheutras era ina vusch de cumin catolic dapli sin las dietas della Ligia e della Tiara. La dertgira da Glion saveva pia pertgei ch'ella runi quella caussa a Cuera, e vegli buca far ora ella avon il forum della Ligia Grischa, sco ei udeva! Ei dependa ussa mo tgei ch'il landrechter e la Ligia Grischa dian.

¹³ Papa Gregor XIII. Ariguard l'introducziun dil calender niev cp. dr. J. J. Simonet, el Bündner Monatsblatt 1935, pg. 299, spez. 303.

¹⁴ *Arch. fed. Bern*, copias de Vaniescha, tom 71, pg. 56. «... Nella comunità d'Ilanz hanno vigorosamente risoluto cattolici di tener il loro congresso separato da Protestanti, come hanno fatto nella terra di Sagogn il giorno di san Michele, nominando et elegendo proprio ministrale come chiamono, con assessori nente curando le dichiarazioni fatte da Protestanti contro tale eletione anticipata di alcuni giorni al ordinario, che da tempo immemorabile e sempre seguita unitamente, onde si ha occasione di dubitare di qualche grave confusione a quella parte.»

¹⁵ *Archiv cant. Cuera*, Landesakten A II LA 1, 24 de settember 1661.

L'irritaziun era gronda. Igl ambassadur venezian a Turitg plaida dad ina «considerabile confusione» e tema che sch'ei stetti tier quella separaziun, savessi quei era far scola en auters cumins paritetics e caschunar disturbis e discrepanzas.¹⁶

La damonda della separaziun della Foppa vegn discussiunada gia ils 27 de settember (cal. v.) en ina radunonza cun ils dus caus reformai della Ligia della Casa de Diu e dellas Diesch Dertgiras ed il vegl burgamaster de Cuera, Gabriel Belì de Belfort,¹⁷ ensemen cun ils treis numnai deputai de Glion. Quels signurs han buca priu la caussa dalla vart leva ed han manegiau ch'ei savessi aunc nescher grevas difficultads ord quei cass. Els han perquei anflau per bien de clamar ensemen en cuort in congress extraordinari (Beitag), sinaquei che quel emprovi, sch'enzaco pusseivel, de puspei reunir il cumin. Era ein els vegni tier la conclusiun, per evitar ulteriuras divergenzas, de refierer la tschentada de Glion cun sias elecziuns, che dueva ver liug gia la proxima dumengia, entochen suenter il numnau congress. Mo lu dueigi ins en scadin cass era procurar che mintgin hagi la sufficienta segirezia a caschun de quella tschentada.¹⁸ Questa davosa determinaziun ei puspei buca pauc significonta e conferma stupent la perdetga dil historiograf Andreas v. Sprecher, che di che sedadas e sepitgadas sin vias e plazzas, en ustrias ed en radunonzas dellas corporaziuns, gie schizun ellas stanzas dils cussegliers numdir sin cumin, erien duront il 17. e 18. tschentaner negina raritad.¹⁹

Ils 3 d'october (cal. v.) seradunescha il sura numnau congress, screts ora a posta pervia della fatschenta della Foppa. Ei era vegniu ensemen ils treis caus dellas Treis Ligias cun aunc treis deputai ord mintgina dellas Ligias. Ei para ch'ils reformai seigien tuttina senuspi de tractar la caussa pli lunsch mo denter els. Da vart protestanta vegn fatg petras reproschas pervia dil proceder dils catolics. Ei suonda divers discuors che meinan alla perfetga discrepanza. Cau della Ligia Grischa ei gliez onn

16. *Arch. fed. Bern*, Cop. d. Vaniescha, tom 71, pg. 54.

17 *Beeli de Belfort*, veglia schlatta de noblezia che sedismembrescha pli tard en ina lingia de Tavau, ded Alvagni, de Celerina, de Cuera, de Vaz e de Malans. Gabriel Beeli de B. de Cuera ei staus burgamaster dil marcau 1653 e 59 (*Lex. hist.-biogr.* II, pg. 69/70).

18 *Arch. cant. Cuera*, prot. d. dieta. tom 30, pg. 540/42.

19 *Sprecher/Jenny*, Kulturgeschichte der Drei Bünde im 18. Jahrh., pg. 282.

il landrechter Galus de Mont.²⁰ Ad el mava la caussa tier il pli fetg. El oppona stagn encunter quella radunonza; quella hagi buca de sempatschar de quei fatg. Quei seigi ina fatschenta che mondi tier alla Ligia Grischa e mo a lezza. Dil reminent seigi da part dils catolics negin vegnius citaus e negin compariis. Sin quei sesaulza el e banduna la sala ensemen cun ils ulteriurs deputai catolics. Lu ein ils reformai ch'ei restai anavos vegni adaquella de scriver a tuttas vischnauncas della Foppa ina seriusa admoniziun de puspei seunir.²¹

Da quela admoniziun han ils della Foppa buca datgau bia ed ei resta aunc perinaga tier la separaziun. La part catolica della Foppa haveva ussa igl intent de seolver cun sia caussa tier ina dertgira d'in cumin vischinont della Ligia Grischa, tenor usit dil temps en semegliontas dispetas. Da vart reformada temevan ins gest quei, essend che la sentenza della dertgira d'in cumin catolic havess tgunsch saviu confirmar la separaziun. Igl avrel 1662 compara l'autraga ina delegaziun dil cumin reformau da Glion en la persuna de giuncher Cristoffel Montalta e de Leci Kuebler avon il Cussegl evangelic a Cuera per prender cussegl en quei fatg. Quel propona de plidar cun la part catolica e de perschuer quella de desister ded ir avon dretg sco prevediu e ch'ins sesprovi de componer la caussa alla buna entras mediaziun. Quest proponiment ei lu era vegnius communicaus al landrechter regent Simon de Florin de Rueun.²² La mediaziun ei lu vegnida surdada a quater mediators ord la Ligia Grischa, dus catolics e dus reformai.²³ Quels ein denton sestentai adumbatten, pertgei a caschun dil congress a Cuera dils 23 de fenadur era la pacificaziun aunc buca fatga ed il medem congress (Beitag) dat al landrechter de Florin danovamein la seriusa admoniziun de semetter en daditschiert, sinaquei che la scarpanza seigi entras «amicabla mediaziun» dismessa entochen la proxima dieta generala de s. Barclamiu.²⁴

²⁰ *Gallus de Mont* della lingia de Löwenberg, feigl de Guglielm de M., ei staus podestà a Plurs ed a Tirano 1645, capitani en survetschs spagnols, guvernatur en Valtellina 1653 e 5 ga landrechter, naschius 1600 e morts 1674 (Lex. hist.-biogr. V, 137).

²¹ *Archiv cant. Cuera*, prot. d. dieta, tom 30, pg. 540/42, 3 october 1661.

²² *Archiv cant. Cuera*, prot. d. dieta, tom 31, pg. 41/42.

²³ *Archiv fed. Bern*, cop. da Vaniescha, tom 71, pg. 162, 170.

²⁴ *Archiv cant. Cuera*, prot. d. dieta, tom 31, tiels 23. de fenadur 1662.

Sur la dieta generala de s. Barclamiu 1662, che ha giu liug a Tavau resta la discrepanza aunc adina dil tuttatafag pendent. Perquei se volva il cumin reformau da Glion quellaga danovamein tier las duas Ligias della Casa de Diu e dellas Diesch Dertgiras cun lur maioritad protestanta. Quei ei daventau entras mistral Cristoffel Montalta e Brincazi Caprez a caschun d'ina dieta dils 21 de fevrer 1663 (Cal. v.). La radunonza concluda de scriver questa damonda «de buca pintga impurtonza» sco ella punctuescha sezza als cumins dellas Ligias, sinaquei che quels surdettien a lur mess cumpleina plenipotenza, per lu menar la fatschenta ad ina buna fin. Ins encorscha claramain la tendenza, de sche zaco pusseivel, schar ir la decisiun sur las Ligias ora, nua ch'ils reformai havevan la maioritad. Il suranumnau conclus ei era vegnius communicaus alla Ligia Grischa.²⁵

Cau della Ligia Grischa era quei onn 1663 ual igl enconuschent e marzial landrechter Clau Maissen de Sumvitg. Quel era ussa propi buca igl um de schar daventar enzatgei en disfavour dils catolics, aschilunsch sco ins enconuscha el en autras semegliontas caschuns.²⁶ Sin la communicaziun dil numnau conclus protesta el vehementamein encunter il haver scret ora tal fatg sils cumins dellas duas Ligias, essend che quei seigi en disavantatg e pregiudezi della Ligia Grischa. Sco a sias uras Gallus de Mont, aschia pretenda era landr. Maissen che quella fatschenta vegni liquidada mo avon la Ligia Grischa. El motivescha sia pretensiun cun dir che las Treis Ligias hagian avon onns relaschau in decret, e tenor quel stoppien dispetas, che neschien denter ils cumins d'ina Ligia vegnir cussegliadas e decididas avon la medema Ligia.²⁷

Nunditgond la protesta e declaronza de Clau Maissen, scrivan la Ligia della Casa de Diu e dellas Diesch Dertgiras ora a lur cumins la damonda.²⁸ Apparentamein vulevan ins, en cass ch'ei duess «succeder» enzatgei, sco ei secloma el messadi als

²⁵ Ariguard la dieta dils 21 de fevr. 1663: *Archiv cant. Cuera*, prot. d. dieta, tom 32, pg. 15.

²⁶ Comp. surlunder dr. Ant. v. *Castelmur*, Landr. Nik. Maissen, Cuera 1929, pg. 31—60, plinavon v. *Castelmur*, extracts ord ils protocols dil capetel cathedral, digl ordinariat etc., egl *archiv episc. Cuera*, pg. 35—230.

²⁷ Sur la dieta dils 21 de fevrer 1663 e Clau Maissen: *Archiv cant. Cuera*, prot. d. dieta, tom 32, pg. 15.

²⁸ *Arch. cant. Cuera*, prot. d. dieta, tom 32, pg. 18.

cumins — e quei vul bein dir en cass ch'ei duess restar tier la separaziun ni vegnir concludiu enzatgei en disavantatg della part reformada — trer la caussa, sco in fatg de confessiun che pertucchi l'entira tiara, avon las Treis Ligias, cun lur majoritad evangelica.

La fin de zercladur seradunescha la dieta generala dellas Treis Ligias a Glion. Sco cau della Ligia Grischa ha Clau Maissen de presidiar quella. Montalta e Caprez vegnan puspei avon la dieta cun lur lamentaschuns: ei seigien adumbatten sespruai de vegnir ad ina buna fin. Mo cun quei ch'ei setracti en questa dieta buca d'in cass politic ni civil, mobein d'in cass che pertucchi expressivamein «la religiun, la libertad e dretg», sche hagien els sufficienta raschun de recuorer allas Treis Ligias. En num della Ligia Grischa cunterdi Clau Maissen detschartamein a quella pretensiun ed insista che quei cass vegni buca tratgs pli lunsch ch'avon la Ligia Grischa. Maissen era pertscharts dall'impurtonza de buca schar extrader tal cass al forum dellas Treis Ligias, muort la consequenza che quei havess giu. «Jeu sperel», aschia continuescha el, «che las duas Ligias seigien buca intenzionadas de semischedar en nos fatgs e de vuler sminuir nos vegls dretgs e libertads». Maissen sa plinavon relatar ch'ins hagi fatg grondas preparativas per la reuniun dil cumin ed ei seigi gia sbozzau in project de pacificaziun ed ins seigi dil reminent gia perina en differents puncts, els ulteriurs seigi de sperar ch'ins vegni adaquella. La radunonza vul ch'ins prelegi tal sboz de reuniun. Quei ei daventau. La dieta surdat l'ulteriura purificaziun dil sboz e la definitiva cunvegnientscha e pacificaziun als treis elegi: Clau Maissen, Gallus de Mont e Cristoffel Rosenroll de Tusaun, tuts treis ord la Ligia sura.²⁹ Ins crei ded astgar attribuir agl energetic giuven landrechter Clau Maissen in bien ton dils merets de quella entelgientscha, entras haver defendiu cun habilitad ils dretgs della Ligia e rebattiu cun slonsch las tentativas dellas duas outras ligias.

Ils dus de fenadur han ils treis numnai saviu presentar alla dieta il project d'entelgientscha purificau.³⁰ El cuntegn ils suandonts puncts (fuorma scursanida):

²⁹ *Arch. cant. Cuera*, prot. d. dieta, tom 32, pg. 23.

³⁰ *Arch. cant. Cuera*, prot. d. dieta, tom 32, pg. 39—41.

- I. Tuttas maldueivlas proceduras ch'ei vegnidas avon en plaid, ovras ed en praticas dueien esser e restar perdunadas. Ariguard il Risch de Ruschein duei ton il donnegiau sco il culpont saver destinar in ni dus mediaturs ed en cass che la caussa seschass buca lugar en pasch, duei vegnir elegiu in derschader de compromiss, e sch'ils dus san era aschia buca vegnir pacificai, duei mintga part saver numnar in e surschar alla dueivla sort.
- II. 1. Gl'entir cumin della Foppa duei puspei vegnir reunius en in tgierp, sco da vegl enneu stau, sut suandontas condiziuns:
2. Ariguard la mistralia duei la vart dretga dil Rein haver 4 onns il dretg sin quella, la vart seniastra mintgamai dus onns. Mintga vitg e mintga confessiun duei vegnir risguardada proporzionalmein. Il mistral duei vegnir mess sur digl entir cumin. Il salter duei mintgamai esser dal medem liug sco il mistral.
3. Scarvon e bursèr duein vegnir elegi dall'entira tschentada.
4. Geraus e derschaders duei mintga vischnaunca eleger senza lur part. Vischnauncas pariteticas duein observar la dueivla proporziun. Ils elegi duein esser undreivels e capavels umens e vegnir saramentai dagl entir cumin.
5. Ils uffecis de Valtelina duein vegnir reparti sin las vischnauncas proporzionalmein. Taxas e premias duein vegnir fixadas dagl entir cumin ed en cass ch' ins mass en quels graus suls tiarms ora, duei vegnir prevediu dalla Ligia Sura e fixau la taxa (auflag). Era cheu duein las confessiuns vegnir risguardadas a proporz.
6. Ils mess duein vegnir elegi en roda. Croda ei allas vischnauncas catolicas, duein era las reformadas haver lur part.
7. Duess questa entelgientscha vegnir acceptada, sche duein las vischnauncas metter lur geraus e duein quels vegnir saramentai dal mistral.
8. Liug de residenza e dellas radunonzas dil cumin e della dertgira duei Glion esser e restar sco tochen dacheu.

9. En fatgs civils e criminals duei reger egualitad per omisduas confessiuns.
10. Ariguard l' observaziun dils firaus duei dad omisduas vart vegnir duvrau «ina dueivla discreziun». Tgi che duess surveser quei, duei senza risguard della persuna e della confessiun vegnir punius.
11. Las vischnauncas astgan buca extrahar ne vender uffecis ordeifer la Dertgira Aulta.
12. Questa entelgientscha duei esser senza disavantatg ne pregiudezi d' auters cumins.

Quest project era alla gronda part dils presents acceptabels ed ins ha surdau a scadina dellas duas parts ina copia de quel cun la cunzina ded acceptar el.³¹ Igl ei de supponer ch' il contract ei vegnius acceptaus dallas vischnauncas. Sut datum dils 4 de fenadur remarca il protocolist della dieta: «Ils puncts d'entelgientscha ein vegni surdai ad omisduas parts e recumandai ad ellas, de maniera che nus savein sperar che quellas differenzas vegnien lugadas en prompta entelgientscha sco nus spetgein e giavischein».³² Da cheu naven udin nus nuot pli da quella separaziun che havess tgunsch saviu menar tier prigulusas consequenzas, e quei ton pli ch'ei era ualti maruasseivel lezs dis el Grischun.

Strusch era la canera della dertgira nauscha sur dils menaders spagnols de 1659/60³³ secalmada empau, che novas attaccas sedrezzan encunter diversas persunas regentas, en special en Portenza.³⁴ El segneradi de Tusaun vegnan da quei temps ils dretgs episcopals combatti.³⁵ Duront e suenter l' elecziun digl uestg Duri de Mont (1661) fuga la Ligia della Casa de Diu en-

³¹ *Arch. cant. Cuera*, prot. d. dieta, tom 32, pg. 40—41.

³² *Arch. cant. Cuera*, prot. d. dieta, tom 32, pg. 64/65.

³³ Sur de quella dertgira nauscha comp. M. Valèr, die Bestrafung von Staatsvergehen in der Republik der Drei Bünde, Cuera 1904, pg. 212—258. Plinavon Dr. Al. Pfister en las Annalas 40, separat pg. 34—36.

³⁴ *Archiv episcopal Cuera*, Politische Akten (extracts) da dr. Castelmur, pg. 303, 317, 349. Plinavon: *archiv fed. Bern*, cop. d. Vaniescha, tom 71, pg. 57, 69 e ss.

³⁵ *Arch. fed. Bern, Nunziatura*, vol. 53, sut ils 6 de mars, 30 d'avrel, 20 de zercl. ed ils 16 de dec. 1659 e vol. 54, ils 17 de schaner 1660 e vol. 55, sut ils 6 de schaner, e 28 de fen. 1661.

cunter igl elegiu, sco buc in de sia ligia.³⁶ Gronds malruaus cuschunan lezs dis era las tentativas della Frontscha per ina renovaziun della ligia e las cuntermesiras della partida spagnola.³⁷ Igl ambassadur venezian a Turitg, Paolo Sarotti, characterischa il mal dil temps aschia: ei regia el Grischun diversas pintgas dissidenzas en divers loghens, mo ins crei de puder preservar d' in barschament pli grond, essend che la malperina regia buca mo denter catolics e protestants, mobein denter quels sezs era.³⁸

³⁶ Comp. *Bündner Monatsblatt* 1957, pg. ??

³⁷ *Archiv episcopal Cuera*, Politische Akten 1600—1700 da dr. Castelmur, pg. 319, 329, 339, 341, 349 e ss.

³⁸ *Arch. fed. Bern*, copias de *Uaniescha*, vol. 71, rapport dils 12 de nov. 1661, pg. 67.